



Ilis affons dall'emprema tochen sisavla classa da Rueun ein separticipai ad ina acziun speciala ch'ei s'accordada cun lur jamna da project tiel tema «rumien». Silla foto ils scolars, ils scolasts, la squadra dils luvvers communalis. Sisum dretg il meinascola dalla vischnaunca Ilanz/Glion, Silvio Dietrich.

FOTO A. BEELI

# 52,5 kilos rumien en duas uras

## La scola primara da Rueun en acziun speciala a Glion

■ (anr/abc) Gliendisgis suentermiezgi han ils affons dalla scola primara da Rueun cun lur scolasts priu igl auto da posta tochen Glion. Enteifer lur project dall'jamna vargada ein els separticipai ad ina acziun speciala. Il parlamentari Gieri Darms da Glion ha envidau els da gidar da rimnar rumien el marcau da Glion. Mintga scolar e mintga classa ha retschert ina indemnaziun per la cassa da scola. Allas 13.30 ein ils scolars arrivai a Glion. Immediat ein els serendi culs scolasts ella via da scola. Visavi la casa da scola da Glion sesanfla la fatschenta dad uras veglias da Gieri Darms. Suenter il beinvegni han els retschert il pensum per las proximas duas uras. Ei fuss stau planisau che Gieri Darms fuss staus sil plaz per beneventar ils affons e surdar il pensum e declarar las cundiziuns. El fuvadenton aunc sin viadi da Turitg a Glion pervia d'in aviun ch'ei setschenta cun retard a Kloten. L'acziun ha tuttina giu liug. Mintga scolar ha retschert ina tastga per deponer il rumien rimnau. Pensum eis ei stau da rimnar a Glion enteifer duas uras aschi bia rumien sco pusseivel.

### Melli stumbels da cigarettas

Per la scola primara da Rueun eis ei stau in'acziun ch'ei s'accordada fetg bein cul project ch'ils scolars havevan tractau l'jamna vargada. Els ein numnadamein sefatschenta culla tematica «rumien» ed «evitar rumien». Ellas lecziuns cun urari special ed adattau ein els s'approfondi ella tematica. Ils scolars han empriu d'enconuscher metodas d'evitar rumien, els han zambergiau, fatg giugs cun rumien e retschert informaziuns con impurtont ch'igl ei dad evitar e da zavrar il rumien. Ella societad da consum eis ei impurtont ch'ils affons sappien buca mo fierer naven, anzi, ch'els sappien era tgei che reciclar vul gir. E ch'ins anfi a Glion, el center commercial dalla regiun, dapli rumien che a Rueun ei stau evident. Tier l'incumbensa eis ei stau da rimnar era stumbels da cigarettas. Per mintga kilo rumien haveva Gieri Darms empermess ina summa fixa ella cassa da scola. Ils stumbels da cigarettas ein stai da quintar singul, per mintgin fuvu cunvegni 20 raps.

En gruppas ein ils affons parti per las vias e plazs da Glion. Duas uras pli tard ein els returnai sil plaz avon la fatschenta

da Gieri Darms. Leu havevan ses collaboratur installau ina stadera. E leu han els pesau mintga tastga cun cuntegn. Sin ina tabla dasperas han els scret si il num dil scolar, la peisa dalla tastga sco era il diember da stumbels da cigarettas rimnai. Mintga scolar ha silsuenter fiers il cuntegn dalla tastga sil «lidimer», ina cuvrida che fuv semtgada giun plaun aposta per l'acziun. Suenter svidar han ils collaboratur da Gieri Darms offeriu a mintga participont in cornet da nuschs ed ina bubronda. Denton fuv igl organisatur dall'acziun arrivaus. Silla tabla nua ch'ils collaboratur havevan fatg il protocol dalla rimnada ha el saviu prender notizia ch'ils 38 scolars havevan rimnau 52,5 kilos rumien. La cefra da stumbels da cigarettas survargava melli. Perinagada ein ils scolars dall'emprema tochen sisavla classa cun lur scolasts Jacob Pfister, Maria Maissen-Vincenz ed Andrea Monn returnai a Rueun cun nov notas da 100 francs. Sco persuna privata ed um da fatschenta ha Gieri Darms giu tschaffen d'organisar l'acziun a favur d'ina cuntrada schubra e tgirada. El ha ludau igl engaschi dils scolars ed ha surdau la biala summa da 900 francs per mauns dalla cassa da scola.